

**Eqqissimatitsisarneq aamma allatigut kulturikkut
eriagisassanik kulturikkut kingornussatut illersuineq
pillugu Inatsisartut inatsisaannik allanngortitsineq
pillugu Inatsisartut inatsisaat
(Nunami allanngutsaaliukkami Kalaallit Nunaata
Avannaani aamma Kangiani illersuinermut
aalajangersakkat sukannernerulersitat, illunik
aserfallatsaaliineq iluarsaasarnerlu pillugit
malittarisassani erseqqissaaneq aamma kulturikkut
kingornussat sumiiffinni kulturikkut
oqaluttuarisaanermut tunngasut inissisimaffigisaanni
ingerlatat sunniutaasa nalilersorneqartarneri)**

§ 1

Eqqissimatitsisarneq aamma allatigut kulturikkut eriagisassanik kulturikkut kingornussatut illersuineq pillugu Inatsisartut inatsisaanni nr. 11, 19. maj 2010-meersumi imaattunik allannguuteqartitsisoqassaaq:

1. § 5, imm. 1-imi, nutaatut ikkunneqassaaq oqaaseqatigiit pingajuattut:

” Nunami allanngutsaaliukkami Kalaallit Nunaata Avannaani aamma Kangiani inussuit tamarmik aamma inussuit pillugit nunap allanngutsaaliukkap iluaniittut oqaluttuat eqqissimatitaapput, ukiut qassit pineqarneri apeqqutaatinnagit.”

2. § 5-imi imm. 4-tut ikkunneqassaaq:

” Imm. 4. Nunami allanngutsaaliukkami Kalaallit Nunaata Avannaani aamma Kangiani sumiiffinnilu immikkut killilerlugit aalajangiunneqarsimasuni, Naalakkersuisut malittarisassiorsinnaapput qanoq nutaanngitsiginissaannik piumasaqaataasunik saneqqutsinnaaneq imm. 1-imi pillugu, oqaaseqatigiinni siullerni aamma imm. 2-mi pineqartut pillugit.”

3. § 6, imm. 2, imatut oqaasertalerneqassaaq:

“ Imm. 2. Qanganitsanit nunamit peerneqarsinnaanngitsunit 2 meterinit qaninnerusumiittumi ingerlatsisoqaqqusaanngilaq. Tamatumali akornusinngilaa tamat inussulianut aamma inussulianiittunut nalunaarsuutinit ornigussinnaaneri, tamanna qajassuussisumik aamma sissuertumik pippat.”

4. § 6 -imi ikkunneqassapput imm. 3-tut nutaatut:

“ Imm. 4. Nunami allanngutsaaliukkami Kalaallit Nunaata Avannaani aamma Kangiani ingerlatsisoqarsinnaanngilaq sunilluunniit qanganitsat nunamiit peerneqarsinnaanngitsunit 100 meterinit qaninnerusumiittumi. Tamatumali akornusinngilaa tamat inussulianut aamma inussulianiittuni oqaluttuanut ornigussinnaaneri, tamanna qajassuussisumik aamma sissuertumik pippat.

Imm. 5. Sumiiffinnut immikkut killilerlugit aalajangiunneqarsimasuni Naalakkersuisut ersarinnerusunik malittarisassiorsinnaapput imm. 2-4-mi qanoq ungasissusissatut piumasaqaataasunut tunngatillugu”

Imm. 4 taamaasilluni imm. 6-inngussaaq.

5. § 18, imm. 2 imatut oqaasertalerneqassaaq:

” Imm. 2. Illunik eqqissisimatitsineq immikkut pisussaaffinnik kinguneqassaaq, illut aserfallatsaaliineqarnerannut aamma killilersuinernik sanaartorfigineqarsinnaanerannut atatillugu, tak. §§ 22 aamma 22 a.”

6. § 20, imm. 2 imatut oqaasertalerneqassaaq:

“ Imm. 2. Naalakkersuisut aalajangiigunik eqqissisimatitsinissamik imaluunniit eqqissisimatitsinermik ingerlatsiinnarnissamik imaluunniit allannguissamik, taava Naalakkersuisut § 22, imm. 1 aamma 22 a, imm. 2-mi aalajangersakkanik saneqqutsisinnaassapput.”

7. § 22, imm. 1 aamma 2 imatut oqaasertalerneqassapput:

” Illunik eqqissisimatitaasunik piginnittut taanna isumannaatsumik pitsaassuseqartissavaat, eqqissisimatitaanera eqqarsaatigalugu. Nalinginnaasumik aserfallatsaaliineq pisassaaq atortussat atorneqareersimasut assingi, periaatsit aamma qalipaait maannamutut ittut atorlugit.

Imm. 2. Nunatta Katersugaasiviata Allagaateqarfialu tamatumunnga immikkut pissutissaqartillugu akuersissutigisinnaavaa atortussanik, periaatsinik aamma maannamut qalipaait atorneqarsimasut assinginik atuinissamik saneqqutsisinnaaneq.”

8. § 22 -ip kingorna ikkunneqassaaq:

” § 22 a. Sanaartornikkut suliassat tamarmik illut eqqissisimatitaasut pillugit Nunatta Katersugaasivianit Allagaateqarfianillu akuersisummik piumasaqaateqarfiupput, suliassat illup eqqissisimatitaasup ilaaniippata, aamma suliassat nalinginnaasumik aserfallatsaaliinerup avataaniippata. Nunatta Katersugaasivia Allagaateqarfialu akuersisummut tunngatillugu atugassarititaasunik ilanngussisinnaavoq.

Imm. 2. Sanaartornikkut suliassat sanaartukkanik eqqissisimatitanillu immikkut ilisimasalinnit misillittagalinnillu sularineqartassapput, ajornanngippallu illup sanaartugartaasa ilaanik taarsiinani.

Imm. 3. Naalakkersuisut sanaartukkanik suliaqarneq pillugu erseqqinnerusunik maleruagassiussapput.”

9. § 24 -ip kingorna ikkunneqassaaq:

” § 24 a. Sumiiffinni eqqissimatitaasuni imaluunniit allatigut kulturikkut eriagissassanik kulturikkut kingornussatut illersugaasuni, tak. § 24, imm. 1, ingerlatat kulturikkut kingornussanut annertuumik sunniuteqarsinnaasutut isigineqartut aatsaat aallartinneqarsinnaapput kulturikkut kingornussanut sunniutissaat nalilersorneqareerpata, tamannalu pillugu nassuiaasiaq Naalakkersuisunit akuerineqareerpat.

Imm. 2. Pisussaaffik imm. 1 naapertorlugu atuuppoq nalunaartussaannermut piffissaliussamut, tak. § 25, imm. 3, aamma pisuni isumaliutigineqarpat kulturikkut eqqissimatitsinissaq imaluunniit allatigut kulturikkut eriagissassanik kulturikkut kingornussatut illersuineramik aqqissuussinissami, aamma pisuni immikkut akuersissuteqarnissamik siunnerfeqartumik suliaqartoqartillugu, tak. § 24, imm. 3, oqaaseqatigiit aappaat aamma § 24, imm. 4, oqaaseqatigiit aappaat. Pisuni taamaattuni taamaattoq pisussaaffik atuuttanngilaq ingerlatsinissamik kissaateqartoq misissueqqaarnissamut, ujarlernissamut imaluunniit aatsitassanik iluaquteqarnissamut akuersisummik tunineqareersimatillugit, kiisalu aamma erngup nukinga iluaqutigalugu nukissiorfiliornissamut tamatumunngalu atatillugu misissuinissanut atatillugu.

Imm. 3. Pineqartoq kissaateqartoq ingerlatassanik pilersitsisoqarnissaanik akisussaavoq nalilersuineramik suliaqarnissamut, nalunaarusiornissamut aamma taassuma Naalakkersuisunut nassiunneqarnissaanut.

Imm. 4. Naalakkersuisut ersarinnerusunik aalajangersagaliussapput kulturikkut kingornussanut sunniutaasartut nalilersorneqartarneri pillugit, kiisalu kulturikkut kingornussanut tunngatillugu nalunaarusiamik suliaqartarnek akuersissuteqartarnerlu pillugit, tamatumani aamma tunngaviusassanik nalilersuisoqarnissaanik aalajangiiniarnermi, aamma paasissutissat nalilersuinermi katersorneqartartussat pillugit.”

10. § 29, imm. 2, oqaaseqatigiit siulleq imatut oqaasertalerneqassaaq:

”Kulturikkut kingornussanut siunnersuisoqatigiit suliani eqqissimatitsinissanut aamma suliani allatigut kulturikkut eriagissassanik illersuineq pillugu inassuteqaateqartassapput, aamma tusarniarneqartassapput § 22 a, imm. 1 naapertorlugu akuersissutinut tunngatillugu.”

11. § 32, imm. 1 imatut oqaasertalerneqassaaq:

“ Unioqqutitsinerit ukuninnga, § 6, imm. 1-4, § 7, imm. 4, § 9, imm. 2, § 11, imm. 2-4, § 16, oqaaseqatigiit siulliit, § 19, imm. 3, § 21, imm. 3, § 22, imm. 1, 22 a, imm. 1 aamma 2, § 24, imm. 3 aamma 4, § 24 a, imm. 1 aamma 2, § 25, imm. 3, § 27, imm. 2 aamma malittarisassat atugassarititaasullu ukunannga tunngavillit; § 3, imm. 3, § 5, imm. 3 aamma 4, § 6, imm. 5, § 18, imm. 3, § 19, imm. 4, § 22 a, imm. 3, § 24, imm. 5, aamma § 24 a, imm. 4. Kalaallit Nunaanni pinerluttulerinermik inatsit naapertorlugu akiliisussanngortinneqarnermik kinguneqarsinnaapput.”

§ 2

Inatsisartut inatsisaat una ullormi 1. juli 2019-imi atuutilissaaq.

Imm. 2. Inatsisartut inatsisaat una § 1, nr. 7 aamma 8 ullormi 1. januar 2020-mi atuutilissaaq.

Namminersorlutik Oqartussat, ulloq 12. juni 2019

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut